





上林藩臺

本月初五日接奉憲札欽奉



諭旨因州判宋昂在京呈遞蕭除口匪十條內

有一條稱外來之匪須用原來



外來由於川江貨船繹夫請嗣

報單上註明原來繹夫若干出關時亦照原數

帶回不准棄留川省等語仰荷鈞示飭查該員

所請事理果否可行即日詳晰妥議具覆等因

卑府當加確訪查渝城為川東水陸總匯之區

上下客貨有二十餘行請帖投稅者百有餘家

四十三

每歲貨船上下其數不可勝計向來川江上水

之船類由沙市雇募繹夫小船十餘名大船二

三十名不等運至渝城交卸其夫即另行受雇

充當權夫下水計他省緞疋磁器各項南貨上

水者固多而川省糧食藥材紅花靛青油蔴等

貨下水者亦復不少往往此船今日甫到其夫

明日即受彼船之雇而去此來彼往歷來商民

稱便若如該員所議各船原夫必令各船帶回

則貨船到渝卸載另裝動需時日每有守至一

兩月者商人既已起岸船戶力不能養膳各夫

此項無食窮民久羈在境轉恐別生事端若云
下水船隻比上水者用夫較少此項餘夫恐其
日積日多查上水客貨行銷四川一省下水客
貨行銷天下故船戶每在渝造船下水水之
船實較多於上水者數倍且雲貴銅鉛運員在
渝雇募權夫每歲需夫不啻五六千名全賴此
項餘夫應用若如該員所議貨船人夫均照原
數帶回則渝郡新造之船無夫可雇而銅鉛船
隻所需之夫將來亦必短缺恐於公私皆有窒
碍至該員所稱川江有七十二灘每船非七八

十名繹夫不能拉送此雖水路實情但此項繹
夫名曰短繹只在各灘就近短雇一灘自有一
灘之夫並不帶至渝城更與原來原去之說無
涉且川省咽喉處處皆有並非專在川東惟在
州縣實力查拿有治人而無治法該州判宋昂
所請貨船繹夫原來原去之法實於事有所難
行應毋庸議緣奉憲札飭查理合據實稟覆

上先臬臺

竊照綦江縣有民人梅學仁推跌同縣民婦李張氏墮胎身死一案控經卑府提訊事屬全虛緣梅學仁有弟梅學義分居各業本年六月十三夜梅學義家園薑被竊次早知覺弟兄二人意欲告官報緝行至縣前適遇同縣民李朝林手提薑籃當向查詢李朝林言買自鄰人王明才隨尋王明才查問言買自不識姓名之人梅氏弟兄當欲將李朝林王明才二人送官經街民羅貴等勸止共言着落二人尋交賣薑之人

二人應允而散梅學仁弟兄自縣回家路過李朝林王明才之門維時李朝林尚未歸家王明才先歸闕立門外梅學仁向言爾等三日內不尋獲賣薑之人交出即以爾等當作賊論王明才以賣薑之人常在場集容易找尋之言回荅當時並未爭論亦無向李朝林家入室搜薑之事有同行之劉星顯黃碗彭三三人可証而李朝林平素鐵匠營生先於六月初八日打造鐵罷令伊妻張氏幫助張氏已帶六個月身孕用力舉錐腰閃腹痛初九日曾經服藥稍愈初十

日復回下堦挫步跌地受傷下血水崩漏十一日又經服藥併潑水送祟有鄰人王明才可證迨十二三十四等日張氏病勢日增延至十四日黃昏墮胎身死李朝林棺殮無資又扶梅學仁弟兄疑賊之嫌起意控官洩忿遂捏是日梅學仁午晌至家搜薑推跌張氏以致墮胎身死等情王明才亦挾疑賊之嫌允為干証次日到官遁狀其意不過欲求梅氏弟兄幫助棺殮之資並非真欲抵命該縣衛令相驗錄供誤聽屍女年姑之言以為幼女無知其言可信遂

執認梅學仁為凶手疊加嚴鞫梅學仁被刑誣服案經通報尚未成招梅學仁之母高氏至府鳴冤卑府當即提集原被人証到案訊悉前情卑府恐有賄和情事反覆究詰衆供確鑿如一併據屍夫李朝林干証王明才投具悔罪甘結呈案是此案情節虛誣似無疑義卑府復檢閱原報供傷據稱驗得已死女胎胞衣紫黑色而供內稱張氏十四晌午推跌即日黃昏墮胎該氏墮胎與推跌時相距不過半日不應胞衣即變成紫黑色且仰面跌地只係驚動胎氣不應

胎孩受傷又屍格內填稱屍身胸膈近左一連
二傷各圍圓三分紫紅色係拍共戳傷張氏身
係婦女斷無赤體見人之理即使被推何致便
傷皮肉至梅學仁用手推開張氏則應手掌用
力亦無僅用兩拍向戳之理種種情節皆非信
讞原報之情節未真即覆訊之供詞可信所有
梅學仁一犯實係無辜之人但案關生死出入
未便率易理合錄全供具詳憲案應否提省覆
鞠抑或另委賢員至渝會審伏候憲臺查核施

行

上藩臬兩臺

本月十四日接奉憲札以鄧都縣申文筒內折出江壯廳監生張映芳等呈詞一張內稱辜寨坪辜教二姓傳習邪教從逆潛回勢恐滋蔓難除其首先報之辜魁一等屢經二姓控害等情飭令甲府密差幹練官吏人等不動聲色詳細訪查再將詞內具稟之人按名喚集詳慎訊供等因併原詞抄發到府奉此甲府當即遵照一面密飭妥役查傳詞內原告六人一面密委職員王廷暉改裝易服潛赴該境密訪確查去後

隨於二十日據委員回稟該員連日改裝在該境之坪上坪下飯店酒舖徧加訪問查得辜寨坪上向年辜教二姓大小男婦共有六七百人自疊次被賊以來人戶彫殘現今只有數十戶約計二三百人零星栖止烟火蕭條又查詞內被告辜興立等四十九名或已經正法或被賊戕害或遠出未歸或先經病故其現存者僅有十六人皆務農安業並無不法情事且其中並有幼稚無知之人等語又據詞內原告監生張映芳王兆龍鄉約葉正現劉子高地鄰葉正學

陳國亮等六人先後到案卑府詳加查訊皆供
伊等並無控告辜教二姓之事所遞呈詞係被
人竊名捏寫伊等並不知情卑府復再三開導
訊得張王二監生平日自守田業所居與辜寨
坪皆在十餘里之外素與坪上辜教二姓不相
認識無從有控告之事又據王兆龍稱該生捐
監時已改名王文治詞內所開王兆龍之名係
該生幼時舊名今係被人竊名誤寫又查鄉約
葉正現辭役已十餘年劉子高辭役已二十餘
年且劉子高年已七十有一切外事不聞而

葉正現又與被告之辜興立兒女姻親素好無
嫌不應有訐告之事又查地鄰葉正學本名葉
占學表字正儒即葉正現之胞弟被人竊名誤
以占學為正學其不知情似屬可信而陳國亮
係種地度日語言朴魯且不識字非能繕寫呈
詞之人所有原告六人均係被人竊名可無疑
義卑府又查原告既係捏名則被告只係被仇
陷害未便查喚多人致滋驚擾隨飭役將首名
辜興立喚案查訊據供各被告蹤跡與職員王
廷曠所訪之說相符又查得辜興立弟兄四人

家頗溫飽平素本分與從前習教之辜興周等
只係遠族而詞內各被告只有敖永宗曾被賊
脅從逃回亦已病故其餘均未曾被脅與所控
從逆潛回之語不符是辜寨坪並無遺有餘孽
確鑿可信所有原被各人業經全行省釋再查
詞內原被告諸人既經詢明無涉則竊名誣告
之人即應嚴究卑府查閱詞內情節大率為辜
魁一徐國泰二人鳴冤或此詞即係二人所繕
亦未可定隨密加訪緝查得徐國泰係渝營軍
功於本年五月間派赴前敵今已半年有餘惟

辜魁一現在江壯居住且曾與辜興文教希
等有結訟之事或係挾仇誣害隨提辜魁一到
案嚴加詰訊據堅供並不知情親筆具結在案
又傳該境附近舖司查問亦無踪跡卑府伏查
自豐都至省路經千有餘里所歷塘舖以數百
計其私啓郵筒猝難定為何塘之事若輾轉窮
推必至累及無辜應請免其深究以安良善而
息羣疑是否有當伏祈憲鑒訓示

與首府趙少鈍太守書

二十七日接誦手教示知省垣調兵赴渝及賊擾遂寧等事俱悉此番賊匪至江壯者係冉添元雷士旺二股自岳池過定遠者聞係徐添德鮮大川張漢潮等股各股渠魁俱會聚定合之間地方空虛如何枝梧而官兵與賊相離半月有餘尚無消息何怪乎其蔓延四境也然所以至此者未必非各路全裁防勇自撤藩籬之故今已成事不說目下惟當亟為補救昨敝處聞警即撥兵七百名餉四千兩分給定遠合州兩

處此時俱已安設妥帖矣刻下省兵一千名若來渝城防守是置兵於無賊之地殊為無謂惟銅梁與遂寧一河之隔防範宜嚴弟昨已稟請委員耑署安居巡檢併發告示勸諭居民立團矣此次既有省兵自宜向近賊處駐紮弟故稟請分四百名赴銅梁六百名赴合州以遏下竄之賊其至合州者由資陽樂至安岳行走正兜在賊人後路既可壯下游之聲勢而與大兵夾擊機會可乘但不知大憲之意如何耳此番賊渡保寧河雖在定遠境內然亦不可諉為孫令

之罪以一百守城之兵豈能禦萬餘之賊耶今
蒙上憲委員接替足見慎重地方顧令至定遠
時弟當立給餉銀令招募壯勇妥為防守但渝
城去冬三次請餉僅蒙給銀五千兩此時早已
罄盡他款銀兩亦已借撥一空省達二局但有
誤銀之信而終不見有銀解到此則事之棘手
者也又聞制府劄調七提臺至渝防守渝城金
湯險固何用此等重兵若此項兵來弟當請其
前往上游赴敵省得在此虛設且兵丁閒住不
免驚擾居民不知高見以為何如再去歲面談
時原有賊至綿州之說今賊已逼射洪若震過
潼川則綿州之說近矣祈吾兄面告兩臺早為
設備也

給辦賑各收令劄

照得川省向來不甚辦理賑務恐各屬經書人等未有熟手將來承辦或有舛悞茲本府酌定章程以便委員書役人等有兩遵循合亟劄知為此仰該州縣官吏即便遵照後開各條飭令委員書役人等遵照辦理毋有舛悞

一稽查戶口散放銀封二事必委佐雜人員幫辦應先分定東西南北四鄉如初次稽查戶口係委員某甲赴東鄉南鄉某乙赴西鄉北鄉則後次散放銀封時即以委員某乙赴東

獨學廬外集

卷三

鄉南鄉某甲赴西鄉北鄉彼此更調以杜虛冒

一應賑銀數必按戶剪封各州縣領到賑銀即令銀匠逐一剪碎按冊內應賑人戶如某姓極貧一戶大幾口小幾口共該銀若干彙作一封即於封面寫明極貧一戶某人大幾口小幾口共銀幾兩幾錢幾分各字樣每十封用線穿成一紮每十紮總作一包仍各歸各里分別存貯委員散賑時查對原冊按名給發以免舛錯

一極貧次貧宜確加核實現目經費不敷大憲先就極貧之民賑濟查造戶口時委員必親至村庄視其家實無升粟寸縷蓄積者方准入極貧若稍有存糧及尚有一二房屋傢伙者皆入次貧聽候續賑

一查造時所有人口或散封時已經病故此項銀兩即應扣存於冊內註明將其銀歸入續賑案內支用

一此番賑濟先儘極貧原為經費不敷起見各州縣查造戶口時便須通盤籌算而設銀若干兩共可賑大小若干口統計均勻查造庶不偏枯若冒昧從事必有先濫後遺此多彼少之弊

一委員經費現奉憲酌定每銀百兩內扣出二兩存備給發查現委各員皆係本境現任之員需費無多該各州縣將此項扣存銀兩儘數分給各委員樽節應用不得藉詞不敷再請加增

通飭所屬各牧令劄

照得民間田土交易應由兩愿斷無官為押買之理迺查閱各屬詞訟事件田土十居八九總由從前地方官惟知以稅課充裕為務並不問地之肥瘠人之貧富一經到官即當堂押令立契投稅便謂其事已了而其間或有買主力綿不能承售勉從官斷反將已業當銀交價者亦有延不交價而結訟者又有契價已交未足賣者不肯退庄買者先行霸種搶割者種種事端從茲而起即如永川縣民呂周化上控一案經

獨學廬外集

五十五

本府提審該田主自謂其業所值不過七百餘串而前任馬令斷令以一千三百串立契遂致彼此結訟不休尚復成何事體恐似此情弊不止永川一處而似此斷法亦不止馬令一人合亟通飭為此仰該州縣官吏查照來劄事理嗣後凡有田土詞訟到官俱當聽兩造願買願賣方可斷令成交若買主無力或別有緣故不願承買概不得當官押令立契倘有仍蹈前習致被上控本府即據實稟揭不能稍為迴護也毋違特劄

通飭所屬各牧令劄

查大小問刑衙門所用刑具

國家自有定式載在律令乃聞各州縣有私造
綑子連枷等項並於鞫獄時踰杠跪鍊及跪碎
瓦等事任意妄行殊為可駭查會理州楊牧大
邑縣楊令均曰非刑斃命之案致干叅處各牧
令皆當引為殷鑒合亟通飭為此札仰該州縣
官吏迅速查明如有舊存前項連枷綑子等一
切違例刑具立即銷毀具文申覆嗣後鞫獄亦
不得擅用非刑倘有不遵一經訪聞或別經告

茲查實定必照例揭叅毋違特劄

給壁山縣張令劄

照得賊匪自江壯擊退之後即上竄合州又聞
廣安岳池一路另有賊匪一股下竄即在定遠
以上之石盤陀地方搶船過河該縣與合州毗
連所有澄江口水次聞已聚眾巡防但賊已渡
河旱路亦應防守本府查得該縣有峯埡地方
地勢險隘可以遏合州一路下竄之賊合行劄
飭為此劄仰該縣與本境熟志地理之人查勘
審度該境界係扼要之處即安設鎗炮率眾防
守倘此外別有要路隘口亦一體嚴防並將查

辦緣由稟覆查考慎速飛速特劄

給銅梁李令劄

照得賊匪此時已擾及遂寧與該縣安居地方
只一水之隔防堵最關緊要本府業已兩次飛
劄飭委該令馳赴安居安置鄉勇迄今未據隻
字申覆茲本府查得安居地方僅有百姓聚集
團練百人踞河防守該縣閉城自守既不設策
防河又不前往立團又不官招壯勇似此緊要
地方竟置之不問有民社之責者當如此耶合
亟劄查劄到該縣即將現在如何設策防河之
處一面悉心辦理一面稟府查考倘再仍前玩
悞本府當據實稟聞大憲恐該令不能當此咎
也飛速慎速特劄

給璧山温典史劄

照得賊匪在石板沱搶渡河西保寧河已失其險合州官弁兵勇勢必自顧城池不能再顧潼川河之西而合州所屬之南津街臨潼川河之濱當保寧河之衝實為璧山以下之障蔽若此處守住則下游可安查該處南津街人戶繁多近日合州近城一路居民渡河避賊俱在南津街居住今在此處聚團可以遏合州之賊理合委員辦理為此劄仰該典史查照來劄事理迅速前往合州南津街地方勸諭居民即日聚集

團練安設鎗炮沿河防守如需火藥赴府請領併將船隻拘泊南岸該典史務必前往剴切曉諭迅速經理本府聞彼處居民半係粵人該典史與之誼切桑梓所言尤易取信現在大兵兜勦賊必欲爰過潼川河果能於此處守住使璧山銅梁等處安堵無驚皆該典史之勞績也本府必稟聞大憲請加優獎該典史斷不可以事非本境草率了事以負本府委任之意安設妥協後酌派實心紳士督率經理該典史仍回璧山本任會同印官防守地方並將辦理緣由詳

稟本府查考慎速飛速特劄

獨學廬外集

六十



給委員王廷暲劄

仰該職員持令赴南岸沿江各渡口及團卡傳諭自臨江門起至土沱止諭令團首劉國輔汪潮薛梁等分傳各團即齊鄉勇每處一二百人常川在卡晝則巡查往來人口夜則施放鎗炮聯絡聲勢以防江壯賊匪偷渡其過渡人口或携有婦孺眷口或携有行李傢伙等項俱准放行其單身男子口音不對形迹可疑之人俱嚴加盤詰不准過渡違者送官究問該職員回程仍向壯岸各渡口一體傳諭毋違特劄

給安居鄉汎官劄

照得賊匪擾及定遠遂寧等處與安居僅一水之隔恐有賊匪偷渡防範最宜嚴密該境距城較遠恐文員不能兼顧本府雖稟請官兵及委員前來亦恐緩不濟急惟團練壯勇最為有益除出示勸諭外該弁係安居專汎合委督率巡防為此劄委該汎官務宜勸諭士民多集壯丁設卡防守併設鎗炮施放以壯聲勢並拘船隻停泊西岸往來人口嚴加盤查併將告示張掛通衢使士民各知踴躍急公該汎官果能實力督率居民防守俾賊人不敢逼近地方安堵無虞即屬守汎有功本府當稟明大憲優加獎勵也慎速特劄

給合州巴縣驛山定遠各牧令劄

照得此番貴州官兵三千名原奉制憲指定分為兩路一由貴州之威寧州入永寧縣一由貴州之仁懷廳入合江縣至瀘州隆昌合路前進今黔省仁懷一路之兵一千三百五十名改由桐梓入綦江縣查綦邑去瀘州已遠此兵未便再令西行致多迂繞是以本府已飭綦邑將該兵由巴縣驛山合州定遠應付前進今兵已過半始奉省局有由隆昌行走之文永川榮昌一路並無准備其勢已難中改况前隊兵丁既走合定後隊兵丁忽改走隆昌一起分為兩路不但非軍行體制且恐帶兵將弁顧此失彼難以約束本府已將黔省遣發兵丁程站歧悞及現在應付行走各緣由稟明局憲查核誠恐該州縣等不得主意合亟飛飭為此劄仰該州縣官吏查照來劄事理將前項黔兵一千三百五十名仍舊全數應付前進毋有歧悞干咎特劄

給江津璧山銅梁各縣令劄

照得前起黔兵一千三百餘名現從桐梓入川由綦江等處應付前進刻下俱已過竣唯查後起尚有續調黔兵三千名已在遵義桐梓分紮聽調將來亦當由綦江入境查前起官兵由巴壁合定前進路稍迂繞後起續調兵三千名似應由江津璧山銅梁遂寧射洪一路行走至潼川聽調程站較為直捷本府現已具稟制府暨省局在案合行劄飭為此劄仰該縣官吏查照來劄事理先期移會早為預備應付免致臨時

給合州定遠牧令劄

照得大兵進剿賊匪需用糧米必多恐各州縣存米不敷供支查近日撥運達州軍米起運在途者甚多該州縣若需米孔亟不妨沿途截留應用合行劄飭劄到該州縣即查照大營需米多寡不拘何處軍米就近截留起運轉送大營俾軍食無缺仍將截留數目通報併報達局糧臺及本府查考慎速特劄

通飭所屬牧令立團練輪操之法以資征
調節

照得州縣鄉勇一項與兵丁相為表裏而往往
不能得力者其事盖有二難欲常川安設則經
費不貲若隨時招募則烏合無紀本府詳悉籌
畫擬立團練輪操之法其法令每一州縣挑選
精壯三百人每十人設一什長每五十人設一
隊長以嫻習火鎗弓箭之人充之凡隊長六人
分領三百之衆以百人為一團分作三團每團
在城操演十日即遣歸二十日如第一團初一

日操起至初十日止第二團即十一日起至二
十日止第三團二十一起至三十日止其人
每月操演十日技藝不致生疎仍可回家二十
日亦不致荒本業其在城操演之日人給口糧
一分是以一百人之費而得三百可用之人即
以重慶所屬計之十三屬每處三百人可得三
千九百人倘緩急征調較新募者自為得力至
其經費壯勇每人日給六分隊長月給銀二兩
統計每月只需銀一百九十四兩有津貼之州
縣即於津貼開銷無津貼之州縣另行設法辦

理可以不費官帑將來教匪平後此項人即作
為團練名目造冊歸州縣管束自不致散而為
匪且可以充緝捕之用如此立法似乎費少而
功多本府業已通稟各憲除俟奉到批示另行
飭知外合飭籌議為此仰州縣官吏即使查照
來劄事理悉心籌議妥立章程先行稟覆毋違
速速特劄

重慶府關防告示

照得官員蒞任循例關防非故事之奉行必推誠以告誠本府初登仕版即列清華繼奉

恩綸曾依

禁近八閩籲俊三楚掌文自矢芑苴不及於門庭猶幸諂譎未生於道路茲承

簡命來典是邦當一麾出守之初遇五方雜處之地恐有奸宄或肆招搖宜示丁寧以防微漸本府起家吳會奉職京華子弟尚寄都門親戚各居鄉里且性無他嗜事必親裁幕府絕請託

獨學廬外集

六十八

之階紳士少夤緣之路闡僕不過看守門戶書吏不過奉行文書政不出於賄成法豈容以身試為此示仰所屬官吏軍民人等知悉倘有外方遊客詭託知交本土莠民巧言撞騙奸同鬼蜮貪類穿窬爾若既隄其術中我豈能寬於格外除明白曉諭仍嚴密查拿政以刑齊必共絕無稽之聽法隨言出即非同不教之誅咸各凜遵毋貽後悔

嚴禁訟師痞棍告示

照得重慶為川東水陸衝要之區商民雲集每
遇鼠牙雀角微嫌動輒興訟訟興未已又統眾
抄搶以繼之一事而牽涉多人一案而拖累數
載推原其故皆因訟師痞棍表裏為奸訟師主
文於內痞棍用武於外彼此挑唆誣姦誣命分
衙岐控硬作干証包遞呈詞串通差約鎖押索
詐百弊叢生甚有原被兩造不願終訟而中証
猶霸持未已者此等奸匪醜類繁多向有二十
八宿三十六天罡七十二地煞等名目殊駭聽
聞吾聞稂莠不除嘉禾不生此而不加嚴治亦
安用官吏為也本應即予查拿究懲姑念事未
發覺且罰不及眾合先出示嚴諭為此示仰合
郡軍民人等知悉爾等遇有錢債口角細故儘
可由親鄰調處即或訟理亦靜候官府審斷慎
勿隨匪人術中自誤身家至於前項訟師痞棍
亦各自洗心滌慮改為良民倘怙終不悛一經
發覺到案重則立斃杖下輕則永遠枷號本府
言出法隨勿謂告誡之不早也特示

木榜告示

為嚴禁積習以安良善事照得川東詞訟繁多本府蒞任以來審訊各屬案件實在負屈含冤者少而牽涉被累者多欲清訟獄當先清致訟之源今擇其尤甚者約舉數條先行飭禁為此示仰所屬官吏約差軍民人等知悉嗣後查照後開各條悉行革除如有再蹈從前積習者官揭吏處約差原被人等皆按例治罪各宜凜遵毋違

一假命案之訛詐宜禁也查謀故鬥毆殺人者

獨學廬外集

七十

定律綦嚴誣告則有反坐之條乃查閱各州縣所告命案或曰偶然口角或曰舊日嫌隙不論病斃自縊自溺等事概以謀殺毆殺控告及至兩造對質皆毫無影響不過別有爭執情由藉人命為聳聽之術此等惡習最為可恨嗣後再有似此以假命案告官圖詐者一經審虛定照反坐律治罪

一竊案之株連宜禁也治賊不可不嚴然須真賊正賊方可懲究乃查閱各州縣所告竊案每案外牽涉多人或曰佃戶為匪而扳及業

主或曰本家為匪而波及地鄰此皆捕役局串以為生發銀錢之地而愚民無知隨其術中東拔西引殊為良民之累嗣後竊案獲犯到官只許就本犯比贓治罪其業主地隣等概不得任意波累

一田土之強賣宜禁也民間田土買賣當由兩顧乃查各州縣案件每有以界址相連控官強售而不肖官員惟知以稅課充裕為務不問地之肥瘠人之貧富輒當堂押令立契投稅曰而良善者竭力勉從官斷奸猾者契價

不楚遂至霸耕搶割種種事端由此起訟獄之繁大半曰此嗣後田土交易必由兩造情願如售主不愿承買概不許控官強賣官亦不得強押成交違者重究

一卡房之濫押宜禁也凡民人有罪到官重者收監輕者押卡原有定例乃查閱各州縣案件不論戶婚田土動輒押卡或詐贓釋放或日久淹斃曰此上控者不一而足差役之索詐擾累固屬可恨而官府漫無覺察亦屬弱職嗣後民間詞訟到案苟非律應科罪之人

只許取保住店不許押卡違者重究
一差役之濫食宜禁也凡民間詞訟應行出差
拘喚者每案差役一二人儘數辦理乃查各
州縣案件所告飯食錢動輒數十千總曰差
役一票入手呼朋引類羣赴原被兩造之家
恣索酒食事未到官而糜費已不可支事後
被控則人無指名無從查問嗣後各州縣承
辦詞訟必票上有名之人方許到原被兩造
之家其事外閑人概不許挿身擾累違者重
責

以上各條皆本府蒞任以來留心查出積
弊立意革除爾等毋得視為具文以身試
法凜之慎之

米市校烙新斗告示

照得渝城為水陸衝途商民雲集戶口衆多所需米石浩繁向有一等奸牙霸持行市名曰米滾子私製斗斛入多出少百弊叢生向來曾經詳請藩憲頒發鐵斗如式製造多斗存貯郡廟令各米市請領行用當時稱便然奉行不力舊弊復萌查謹權同量王政所先豈可任聽市會霸持致為細民之累本應即予查拿懲究姑念法久弊生人情不免惟及早酌改章程以為民便茲以一月為限令爾等米市買賣鋪戶各依憲頒鐵斗另造新斗毋得稍有大小不齊之弊爾等置齊後聽候示期爾等各持斗齊集郡廟候本府率同巴縣親臨較驗烙印散還爾等行用嗣後再有混用無印私斗者許商民人等稟府嚴提究辦本府法在必行爾等毋得觀望遲延自悞生計特示

曉諭江壯鎮居民告示

諭江壯鎮居民知悉查靜觀場昨有賊匪竄逸
滋擾為數無多業經本府聚集團勇擊退爾等
舖戶居民各宜安堵毋恐本府現又會營派兵
過江防守倘賊氛逼近必添兵接濟並放船隻
接應爾等過江此時賊蹤甚遠爾等各協力守
望以靖人心而壯聲勢如有不候示諭先行移
動致惑人心者定以軍法從事不貸特諭

勸諭小河南岸居民集眾防河告示

照得前日賊匪在江北滋擾經本府督率團勇
臨河防守並施放鎗炮擊傷賊人令賊畏懼退
回爾等急公向義情甚可嘉但賊蹤雖去尚在
合州定遠等處上下滋擾現在本府三次飛請
大兵前來進剿不日自當臨境賊匪一遇官兵
接仗必有四竄之勢須多方防範以免踈虞為
此示仰小河南岸居民人等知悉爾等向來急
公出力經本府疊次稟報現已蒙大憲據實入
告諱有告示獎勵即

九重亦洞悉其情爾等此時務宜加倍奮勉富
者出財貧者出力該團首人等妥為經理爾等
居民各量力出資以為坐卡壯勇口糧之用每
團務必聚集多人晝夜巡防聞上路賊人聞有
偷渡渠河者倘有匪船下水即用大炮轟擊渡
河難民亦嚴加盟詰河干船隻俱泊南岸上水
客船諭令不可行走統俟官兵到後撲滅賊匪
然後始可各歸安業本府為保全爾等身家起
見不憚三令五申爾等如果奮勉出力有功本
府定當優獎倘有怠玩不遵本府定即執法重

懲凜之慎之特示

獨學廬外集

七十六

傳諭大小兩河團首牌

照得現在靜觀場有賊滋擾已派兵往勦誠恐有竄逸過河之事所有大小河南岸各團首宜即齊集防範為此傳示各團首知悉爾等即日齊集人衆在團施放鎗炮晝夜巡防限三日內齊全本府當委員分路查驗倘有玩悞不遵者定行嚴究爾等各宜踴躍急公自保身家如堵禦得力定稟明大憲獎賞倘有疎虞自罹兵火之禍後悔無及凜之慎之特諭

諭大小兩河居民告示

照得秋收已畢農務方閑凡我居民正宜保聚
現在賊蹤在雲夔一路此間團卡雖不必聚集
多人致滋糜費然亦不可竟令空虚無備致有
踈虞况將來水淺河窄易於透渡更不可不預
為防備今本府為爾等酌定章程凡沿河團卡
每卡酌派四人晝夜坐守此項坐卡者即由附
近居民每家各出一人自備口糧燈火四家共
出四人同守一卡以五日為一班第六日下班
即另派四家出四人接替其應如何預為輪派
之處責成團首紳士秉公分派稽查本府仍密
行查訪倘有空虛無人之卡惟團首是問倘近
地有賊匪之信坐卡者迅速報知團首團首一
面報官一面即齊集人衆防守不得怠玩踈忽
本府為保守地方起見爾百姓各體吾心勿憚
勞費凜之慎之毋違特示

勸諭安居鄉士民集衆防河告示

照得現在賊匪偷渡保寧河擾及遂寧縣界與該縣安居地方僅一水之隔恐有賊匪偷渡防範最關緊要該境士民應公立團勇沿河防守以資保障為此示仰安居鄉紳士軍民人等知悉爾等務宜多集丁壯安設鎗炮施放以壯聲勢仍晝夜巡防河干船隻盡行拘泊西岸往來難民均嚴加盤詰俾賊匪聞知地方有備不敢前來即屬爾等之功本府當稟明大憲優加獎勵倘有踈虞禍及身家關係匪淺慎之勉之特

守寨章程告示

照得葉寨聚守原為堅壁清野之計而賊至仍不免於破寨然掠者非寨之不堅乃有寨而不能守之故也茲本府目擊爾等荼毒之苦特酌定守寨條規十二則俾爾等寨首及眾百姓講求習練庶賊至有所約束遵循不致復如前此被賊破寨遭其焚掠之慘所有守寨事宜開列於後

一賊匪偷寨每乘黑夜雨夜用繩梯爬牆而入爾等一聞賊警無論晝夜晴雨均須常川瞭

望以免疎虞

一賊匪攻寨每指東擊西如賊在前面爾等悉眾向前拒守而後面空虚遂為賊匪偷越而進茲為爾等立法寨眾平日先要分定段落東西南北各守一方另揀精壯人丁作為游隊其人數以多為妙倘賊從東至即令游隊壯丁赴東方協同東面守牆之人極力堵禦其西南北三面守牆之人仍各守本位不得擅動賊從西方南方北方而來者亦照此章程是則以大隊當賊之衝而以餘人守空虚

之處庶幾耳目周徧使賊無間可乘

一賊匪攻寨每乘夜而至爾等守寨者夜間寨牆內不必點燈唯於寨牆外約三五丈之遠分積柴草點火照耀其火亦不必過大以照見十里為度寨內人眾分立牆內瞭望則賊不見寨眾之虛實而寨中能見賊之遠近便覺易於防範

一賊匪攻寨每以放火為能爾等寨內房屋茅草者居多須距寨牆稍遠約以十丈為率使賊隔牆放火不能燃及便可無虞爾等現在寨內倘有近牆茅草房屋即行移蓋勿得觀望自悞

一古人寓兵於農之法農隙可以講武事現當田穀登場農事方閑爾等寨中精壯人丁正可操演技藝以資守衛之用茲為爾等立法每以五十人為一隊以嫻習武藝之人領之或習火鎗或習弓箭即由寨首查考勤惰倘有武藝出色之人即拔為隊長教習眾人仍稟地方官賞以軍功若遇賊至即責成隊長帶領眾人赴卡防守并各寨設立傳單偵探

賊踪彼此關會以聯絡聲勢果有殺賊立功者定當稟明大憲奏明賞以實缺官弁此不但自保身家亦爾等功名之路各宜自勉毋忽

一田穀登場向來民間往往私自窖藏平地以致賊未被挖不特民食無資且為賊留糧此事甚有關係茲爾等所收穀石一概上寨收藏不得有顆粒貽留在野倘有畏盤運之煩仍前私窖平地者一經查出定將所窖穀石充公勿貽後悔

獨學虛外集

八十二

一寨中火禁宜嚴凡賊至時倘有失火情事寨衆必致驚惶因而失事者甚多今後寨中概不許點夜燈以防火燭并預備救火器具以備不虞

一立寨必憑高險之處每無泉水倘被賊圍寨中斷水即難固守查山頂未能掘井然可以開挖池塘爾等酌于寨中隙地多挖池塘平日貯水滿足隨用隨補以免臨時受乾渴之患

一寨中火藥有限接濟為難爾等遇賊至圍寨

時但於牆上安放鎗炮未至十步之內不得先行施放虛費火藥於無用之地

一官兵過往遇夜每有上寨借宿者必須查明來歷如有面生可疑之人一概不准留住以防奸細

一築寨勢必憑高爾等寨外或有高峰峻嶺可以俯瞰寨中虛實者倘一為賊踞則寨即難守爾等各寨如有此等地勢即將高處來路挖斷仍於此面將寨牆加高以資障蔽

一官兵入境需用向导爾等各寨俱本境土人

必知路迺嗣後遇有大兵到時即派熟悉路迺之人逐程引導前進

以上各條本府詳議酌定稟明大憲飭導爾等務各謹守毋得視為具文勉之凜之

合州張姓冒認主僕案判語

審得合州文生張普等具控徐浩逆奴奪產一案緣張普之高祖張泐聖在

國初時教讀為生有徐浩之高祖徐貞生幼年聽雋張泐聖留在家中教養成入及長贅之為壻嗣後貞生以壻為子更名張天杓考試入銅梁縣學從此張徐兩家以中表而作弟兄歷年無異迨至乾隆十七年徐氏復姓歸宗呈明有案至嘉慶二年十二月十五日張普之弟張曙向徐浩借貸不遂出言嫚罵張曙遂捏稱徐貞

生乃張氏之奴其妻即張氏婢女復偽造順治二年三月二十八日買奴文約一紙具控又呈康熙四年張氏呈緝逃奴小保曾女夫婦牌票一張以為案據意欲假主僕名分為詞爭佔徐氏風埡地方田業徐氏不甘兩造結訟雖兩家子孫自己亦不明其原委遂致州訊不結張普張表復至府具控提案集訊之下世遠年湮兩無憑証惟查州卷據張氏所呈買奴文契一紙係順治二年三月二十八日所立查是年張獻忠尚踞全蜀閭閻正在亂離不應有立契買奴

之事且順治三年十二月

王師西下獻逆伏誅川地始入版圖安得一年以前民間文契即有順治紀年字樣此約之為偽造毫無疑義至康熙四年遵義道緝牌內只言逆奴小保夫妻並未指明小保何姓豈能定為徐氏之祖且牌稱備財討到小保夫妻則可知小保夫妻均屬價買與張曙在州原呈所稱將婢女給配之說顯然矛盾則緝牌又非可憑之據也至所稱風埡田業曰張默遊宦福建後歸至水洞地方病故未及清理查所呈家乘內

獨學廬外集

八十五

張默病故係雍正十三年之事而張默之長子文中時已一三歲次子文斯已三十四歲三子文星已二十八歲四子文南已二十三歲俱已成人知事當時豈不能清理而直待六十餘年之後文南之子張普張曙始為清理此所控佔業匿契之說又屬子虛也但徐氏之祖徐貞生既經張氏之祖張泚聖恩撫成人又曾三世以張為姓飲水思源當知酬報今令徐氏子孫公出銀一百兩交張氏子孫買田一塊以為張泚聖墳塋祭掃之費嗣後兩家子孫各以中表

往來仍宜和好所有緝牌奴券查係虛誣塗銷
附卷張曙扶嫌肇衅應照冒認良人為奴婢律
問擬回事犯在兩次
恩詔以前免科本罪究屬不應杖責示警此判



